

佩文齋廣羣芳譜卷第九十八

藥譜

兔絲 女蘿別見木譜

原兔絲一名兔縷一名兔蘂一名兔蘆一名兔丘 廣雅云兔

丘兔絲也一名女蘿 埤雅云在木為女蘿在草為兔絲一名赤網一名玉女

爾雅云蒙玉女一名唐蒙 爾雅云唐蒙女蘿女蘿兔絲一名火燄草

庚辛玉册云火燄云即兔絲子一名狐絲一名金線草蔓生處處有之

以冤句者為勝生懷孟林中及黑豆上者入藥更良夏

生苗色紅黃如金細絲遍地不能自起得草梗則纏繞

而生其子入地初生有根及長延草物其根自斷無葉

有花白色微紅香亦襲人結實如粃豆而細色黃生於

兔絲

梗上味辛甘平無毒主續絕傷補不足益氣力肥健人
堅筋骨添精益髓養肌去腰痛膝冷久服明目輕身延
年去面黥悅顏色

彙考

原

詩小雅蔦與女蘿施于松柏

增

史記龜策傳

下有茯苓上有兔絲

呂氏春秋

或謂兔絲無根也其

根不屬地茯苓是也

淮南子

兔絲無根而生茯苓抽

兔絲死

博物志

女蘿寄生兔絲兔絲寄生木上生根

不著地

抱朴子

兔絲之草下有伏兔之根無此兔在

下則絲不得生於上然實不屬也

兔絲初生之根其

形似兔掘取剖其血以和丹服之立變化任意所作

酉陽雜俎兔絲子多近棘及藿山居者疑二草之氣類

也

集藻

五言古詩

原

宋謝朓詠兔絲輕絲既難理細縷竟

無織爛熳已萬條。連綿復一色。安根不可知。縈心終不
測。所貴能卷舒。伊用蓬生直。唐李白古意君爲女蘿
草。妾作兔絲花。輕條不自引。爲逐春風斜。百丈託遠松。
纏綿成一家。誰言會面易。各在青山厓。女蘿發馨香。兔
絲斷人腸。枝枝相糾結。葉葉竟飄揚。生子不知根。因誰
共芬芳。中巢雙翡翠。上宿紫鴛鴦。若識二草心。海潮亦
可量。元稹兔絲人生莫依倚。依倚事不成。君看兔絲
蔓。依倚榛與荆。荆榛易蒙密。百鳥撩亂鳴。下有狐兔穴。
奔走亦縱橫。樵童斫將去。柔蔓與之并。翳薈生可恥。束

縛死無名桂樹月中出珊瑚石上生俊鶻渡海食應龍
升天行靈物本特達不復相纏縈纏縈竟何者荆棘與
飛莖 **增**明薛蕙兔絲根株不自立枝蔓爲誰飾偶同
雜俎文未比朱絃直園客何由整天女詎堪織暫附松
柏枝終辭霜露色

詩散句

原

古詩十九首兔絲附女蘿

梁江淹兔絲及

水萍所寄終不移

增

金雷瑄綿綿兔絲草

唐喬知

之南山羃羃兔絲花

陸龜蒙教疎兔縷金絃亂

別錄

原

修治凡用以溫水淘去沙泥酒浸一宿曝乾搗

之不盡者再浸曝搗須臾悉細又法酒浸四五日蒸曝
四五次研作餅焙乾再研末或云曝乾時入紙條數枚

同搗卽刻成粉且省力也
辨訛勿使天碧草子真相
似但味酸澀并黏也
服食抱朴子仙方單服法兔絲
子一斗酒一斗浸曝乾再浸又曝酒盡乃止搗篩爲末
每酒服二錢日二服治腰膝去風明目久服令人光澤
老變爲少十日外飲啖如湯沃雪

五味子

增爾雅蒨莖藟注五味也疏按本草五味子一名會及

一名玄及唐本注云五味皮肉甘酸核中辛苦都有鹹
味此則五味具也
圖經本草五味春初生苗引赤蔓

於高木其長六七尺葉尖圓似杏葉三四月開黃白花
類蓮花狀七月成實叢生莖端如豌豆許大生青熟紅

紫入藥生曝不去子今有數種大抵相近雷斅言小顆皮皺泡者有白撲鹽霜一重其味酸鹹苦辛甘皆全者爲真也 [本草綱目] 南產者色紅北產者色黑氣味酸溫無毒益氣治欬逆上氣勞傷羸瘦補不足養五臟除熱生肌治中下氣止嘔逆補虛勞令人體悅澤明目暖水臟壯筋骨治風消食治反胃霍亂轉筋疝癖奔豚冷氣消水腫心腹氣脹止渴除煩熱解酒毒生津止渴治瀉痢補元氣不足收耗散之氣

彙考

增

抱朴子 五味者五行之精其子有五味淮南公

美門子服之十六年面色如玉女入水不濡入火不灼

覆盆子

原覆盆子

李氏藥錄云子似覆盆之形故名

一名缺盆 一名葶

爾雅云葶藶益

注云覆盆也

一名插田蕪 一名烏蕪子 一名大麥苒 一名栽

秧蕪

本草綱目云五月子熟其色烏赤故有諸名

一名西國草 一名畢楞伽

見海上

一名馬瘦 一名陸荆

見藥性本草

處處有之 秦吳尤

多藤蔓莖有鈎刺 一枝五葉 葉小而青背微白 光薄無

毛 開白花 四五月實成 子小於蓬蘽而稀 疎味酸甘 外

如荔枝 支大如指 頂軟紅可愛 生青黃熟烏 赤山中人及

野采賣 少遲則就枝生蛆 食之五六分熟 便采烈日曝

乾 不爾易爛 氣味甘平 無毒 益氣輕身 補虛續絕 益腎

明目悅澤肌膚安和五臟

彙考原夷堅志潭州趙太尉母病爛弦疴眼二十年有

覆盆子

老嫗云此中有蟲吾當除之入山取草蔓葉咀嚼留汁入筒中還以皂紗蒙眼滴汁漬下弦轉盼間蟲從紗上出數日下弦乾復如法滴上弦又得蟲數日而愈後以治人多驗乃覆盆子葉也蓋治眼妙品

集藻五言古詩增宋王右丞覆盆子靈根茂永夏幽磴羅深叢晶華發鮮澤葉實分青紅搜尋犯晨露採摘勤村童籍以烟筍籜貯之霜筠籠

別錄原修治采得揀淨搗作薄餅曬乾密貯臨時酒拌蒸用采時不見水取汁作煎爲果著水則不堪煎

蓬蘽

增本草綱目一名覆盆一名陵蘽一名陰蘽一名寒莓

李時珍曰蓬蘽與覆盆同類故別錄謂一名覆盆此種生於丘陵之間藤葉繁衍蓬蓬蘽蘽異於覆盆故曰蓬蘽陵蘽卽藤也

原藤蔓繁衍莖有倒刺逐節生葉大如掌狀類小葵葉面青背白厚而有毛六七月開小白花就蒂結實三四十顆成簇生則青黃熟則紫黯微有黑毛形如熟椹而扁冬月苗葉不凋者俗名割田蘽氣味酸平無毒安五臟益精氣令人有子益顏色長髮久服輕身不老 一種蔓小於蓬蘽一枝三葉葉面青背淡白而微有毛開小白花四月實熟其色紅如櫻桃者俗名薹田蘽卽爾雅所謂蘽者也故郭璞注云蘽卽莓也子似覆盆而大赤色酢甜可食此種不入藥

懸鉤子

本草綱目 蓬蘽 懸鉤子 五

增爾雅蒟山莓註今之木莓也實似蔗莓而大亦可食

本草綱目懸鈎子一名沿鈎子一名山莓一名樹莓

陳藏器曰莖上有刺如懸鈎故名懸鈎樹生高四五尺其莖白色有倒

刺其葉有細齒青色無毛背後淡青頗似櫻桃葉而狹

長又似地棠花葉四月開小白花結實色紅今人亦通

呼為蔗子氣味酸平無毒醒酒止渴除痰去酒毒搗汁

服解射工沙虱毒

蛇莓

增本草綱目蛇莓一名蛇蔗一名地莓一名蠶莓汜機

地而生故曰地莓吳瑞曰蠶老時熟紅於地其中空者為蠶莓中實極紅者為蛇殘莓人不噉之恐有蛇殘也

就地引細蔓節節生根每枝三葉葉有齒刻四五月開

小黃花五出結實鮮紅狀似覆盆氣味甘酸大寒有毒
治胸腹大熱不止傷寒大熱及溪毒射工毒甚良通經
協瘡腫傅蛇傷湯火傷

使君子

原使君子一名留求子

開寶本草云俗傳潘州郭使君療小兒多是獨用此物故號爲

使君子本草綱目云按南方草木狀謂之留求子療嬰孺之疾則自魏晉已用但名異耳其莖作藤

生如手指大如葛繞樹而上葉青如五加葉五月開五

瓣花一簇一二十葩初淡紅久乃深紅色輕虛如海棠

作架植之蔓延若錦實長寸許五瓣合成有稜初時半

黃熟則紫黑其中仁白上有薄黑皮如榧子仁而嫩味

如栗七月采久者油黑不可用氣味甘溫無毒治小兒

使君子

五疝健脾胃除虛熱殺蟲療瀉痢小兒百病瘡癬皆治
凡服使君子忌飲熱茶犯之即瀉

集藻

七言絕句

原

宋無名氏使君子花竹籬茅舍趁溪

斜白白紅紅牆外花浪得佳名使君子初無君子到君
家

木鼈子

增

本草綱目木鼈子一名木蟹

馬志曰其核似鼈蟹狀故以為名

蘇頌

日春生苗作藤生葉有五桠狀如山藥青色而光四月
生黃花六月結實似栝樓而極大生青熟紅黃色肉上
有軟刺每一實有核三四十枚其狀扁而如鼈八九月
采之嶺南人取嫩實及苗葉作茹蒸食李時珍曰木鼈

核形扁礪砢大如圍碁子其仁青綠色氣味甘溫無毒
治折傷消結腫惡瘡生肌止腰痛除粉刺黥黷婦人乳
癰治疔積痞塊利大腸瀉痢痔瘤瘰癧

番木鱉

增本草綱目番木鱉一名馬錢子一名苦實把豆一名

火失刻把都

狀似馬之連錢故名馬錢

蔓生夏開黃花七八月結實

如栝樓生青熟赤亦如木鱉其核小於木鱉而色白彼
人言治一百二十種病或云以豆腐制過用之良或云
能毒狗至死氣味苦寒無毒治傷寒熱病咽喉痺痛消
痞塊竝含之嚙汁或磨水嚙嚙

馬兜鈴

增本草綱目馬兜鈴一名都淋藤一名獨行根一名土

青木香一名三百兩銀藥根名雲南根寇宗奭曰蔓生附木而上葉脫

時其實尚垂狀如馬項之鈴故得名也李時珍曰其根吐利人微有香氣故有獨行木香之名嶺南人用治蠱

隱其名爲三百兩銀藥蘇頌曰春生苗作蔓繞樹而生葉如山蕨

葉而厚大背白六月開黃紫花頗類枸杞花七月結實

如大棗狀似鈴作四五瓣根微似木香大如小指赤黃

色氣味苦寒無毒治肺熱欬嗽痰結喘促血痔瘻瘡肺

氣上急解蛇蠱毒根氣味辛苦冷有毒治鬼疰積聚諸

毒熱腫取汁服吐蠱毒治五種蠱毒

預知子

增本草綱目預知子一名聖知子一名聖先子一名盍

合子一名仙沼子

馬志曰相傳取子二枚綴衣領上遇有蟲毒則聞其有聲當預知之故有

諸蘇頌曰作蔓生依大木上葉綠有三角面深背淺七

月八月有實作房生青熟深紅色每房有子五七枚如

皂莢子斑褐色光潤如飛蛾其根治蠱功勝於子山民

曰為聖無憂子仁氣味苦寒無毒治殺蠱療蠱治諸毒

疔癬氣塊消宿食止煩悶利小便催生中惡失音髮落

天行溫疾塗一切蛇蟲蠶咬治一切病

牽牛

原牽牛

本草注云此藥始出田野人牽牛謝藥故以名焉

一名盆甌草

酉陽雜俎云盆

甌草即牽牛子也結實後斷之狀如盆甌其中有子似龜

一名黑丑白丑一名草金

鈴一名狗耳草

本草綱目云近人隱其名為黑丑白者為白丑蓋以丑屬牛也金鈴象子形狗

黃基芳譜

藥譜六

預知子

牽牛

八

耳象處處有之有黑白二種黑者野生尤多二月種子
葉形三月生苗作藤蔓遶籬墻高者或二三丈蔓有白毛斷
之有白汁其葉青有三尖如楓葉花不作瓣如旋花而
大碧色其實有蒂裹之生青枯白核與棠棣子核相似
但深黑耳白者蔓微紅無毛有柔刺斷之有濃汁葉團
有斜尖並如山藥莖葉花淺碧蒂紅色核白色稍麤其
嫩實蜜煎爲果名天茄氣味苦寒有毒治水氣在肺喘
滿腫脹下焦鬱遏腰背脹腫大腸氣秘風秘卓有奇功
但病在血分及脾胃虛弱而痞滿者則不可取快一時
及常服致傷元氣

集藻

五言古詩

增

宋梅堯臣牽牛楚女霧露中籬上摘

牽牛花蔓相連延。星宿光未收。采之一何早。日出顏色收。持寘梅窓間。染薑奉盤羞。爛如珊瑚枝。惱翁齒牙柔。齒牙不能餐。梁肉坐爲仇。牆東有冬瓜。費盡滋漑力。

牽牛獨得志。抽走無尋尺。旣上我屋壁。復罨我籬落。遊藤僅細綉。逐節分豆葉。未欲揮鋤斤。且與妝秋色。任他繞屋去。度表幽人宅。蘇軾賦園中所有牽牛非佳花。

走蔓入荒榛。開花荒榛上。不見細蔓身。誰翦薄素紗。浸之青藍盆。水淺浸不盡。下餘一寸銀。嗟爾脆弱草。豈能凌霜晨。物性有稟受。安問秋與春。元郝經甲子歲後。

園牽牛野花照天。星星中花亦盛長。夏蔓草深疎籬掩。斜徑幽庭日無事。森寂淡相映。繚繞絲亂垂。點綴葉相。

並金風一披拂零露光彩競參差碧玉簪縮插滑欲迸
霜絲吐冰同容色好娟淨堂陰青錦張牆背紫苔瑩時
方鵲橋成佳節當秋孟織女能剪裁天河洗尤稱女以
秋爲期郎將花作證風雨開雲屏鸞皇鏘月鏡處處乞
巧筵家家喜相慶五年江館客萬事成墮甌不能致龍
節空自悲虎奔永日鑿炎蒸中暑甘臥病對花淚盈目
坐起不覺瞑雲漢見雙星回頭看斗柄遙憐小兒女婿
嫁俱未竟中流虞風波相見何日更
明吳寬牽牛本
草載藥品草部見牽牛薰風籬落間蔓生甚稠繆誰琢
紫玉簪葉密花仍稠日高卽擎斂豈是朝菌儔陰氣得
獨盛下劑斯見收便須作花庵誰與迂叟謀

五言律詩 **增** 宋邵雍花庵多牽牛清晨始開日出已瘁

花雖甚美而不能留賞望遠雲凝岫妝餘黛散鈿縹囊
承曉露翠蓋拂秋烟嚮慕非葵止彫零在槿先才供少
頃玩空廢日高眠 葉開深如幄花繁翠似鈿瀼瀼零
曉露冪冪蔽晴烟謝旣成番次開仍有後先主人凝佇
看長是廢朝眠 趙蔗境牽牛西風樵子谷藤蔓絡柴
關名在星河上花開曉露間秋空同碧色曉日轉紅顏
若挂青松頂翛然不可攀

五言絕句 **增** 宋文同牽牛花柔條長百尺秀萼包千葉
不惜作高架爲君相引接

七言絕句 **增** 宋楊萬里牽牛花素羅笠頂碧羅簷曉卸

藍裳著茜衫望見竹籬心獨喜翩然飛上翠雲簑莫
笑渠儂不服箱天孫爲織錦雲裳浪言偷得星橋巧只
解冰盤染紫薑曉思歡欣晚思愁繞籬縈架大嬌柔
木犀未發芙蓉老買斷西風恣意秋姜夔詠牽牛青
花綠葉上疎籬別有長條竹尾垂老覺殘妝差有味滿
身秋露立多時不見青青繞竹生西風籬落抱枯藤
道人一任空花過愁殺山陰覓句僧楊巽齋牽牛青
青柔蔓遶修篁刷翠成花著處芳應是折從河鼓手天
孫斜插鬢雲香施東洲牽牛一泓天水染朱衣生怕
紅埃透日飛急整離離蒼玉珮曉雲光裏渡河歸林
逋山牽牛圓似流泉碧翦紗牆頭藤蔓自交加天孫滴

下相思淚長向秋深結此花

詩散句增宋蘇軾牽牛獨何畏詰曲自牙蘂走尋荆與

榛如有宿昔約秦觀籬落秋暑中碧花蔓牽牛趙

山臺秋來難得花成染閒引牽牛上短籬盧贊元紅

芭蕉映黑牽牛金高士談風動牽牛晚花碧

別錄原修治凡采得子曬乾水淘去浮者再曬拌酒蒸

從已至未曬乾收之臨用春去黑皮今多只碾取頭末

去皮麩不用亦有半生半熟用者

栝樓

原栝樓一名果羸一名瓜萋一名天瓜一名黃瓜一名

地樓一名澤姑爾雅云果羸之實栝樓注云今齊人呼

之為天瓜本草綱目云羸與瓜同許慎

云木上曰果地下曰菰此物蔓生附木故得兼名栝樓
卽果羸二字音轉也亦作菰藟後人又轉爲瓜蒌古者
瓜姑同音故所在有之三四月生苗引藤蔓葉如甜瓜
有澤姑之名

葉而窄作叉有細毛七月開花似壺蘆花淺黃色結實

在花下如拳生青至九月熟黃赤色形有圓者圓者色黃皮厚

蒂小爲雌有銳而長者長者皮赤蒂麤內有扁子大如

絲瓜子殼色褐子色綠多脂作青氣根一名白藥一名

瑞雪一名天花粉直下生年久者長數尺大二三圍秋

後掘者有粉夏月者有筋無粉不堪用氣味甘寒無毒

治胸痺潤肺燥治欬嗽滌痰結利咽喉止消渴利大腸

消癰腫瘡毒降上焦之火使痰氣下降不犯胃氣子性

同補虛勞潤心肺治吐血腸風下血赤白痢手面皴口

乾根甘酸微苦寒製爲粉潔白美好大宜虛熱人解煩渴行津液除腸胃中痼熱治熱狂時疾通小腸消腫毒乳癰發背痔瘻瘡癩排膿生肌消撲損瘀血莖葉味酸生津止渴潤枯降火

彙考增雞肋編燕地女子冬月用苦萋塗面謂之佛妝但皆傳而不洗至春暖方滌去久不爲風日所侵故潔白如玉也

別錄原修治凡使皮子莖根其効各別古方全用後乃分別各用用實者去殼皮革膜及油用根者澄粉一作天花粉法秋冬采根大二三圍者去皮寸切水浸逐日換水五日後取出搗泥以絹衣濾過澄粉曬乾每服方

寸七水化下亦可入粥及乳酪中食善治消渴

王瓜

原王瓜一名土瓜一名野甜瓜一名馬炮瓜一名赤雹

子一名老鴉瓜一名師姑草俚人名公公鬚一名鉤瓢

爾雅云鉤藤姑註云鉤瓢也一名王瓜本草注云王瓜
卽今土瓜鄭玄注月令王瓜生以爲菝葜殊謬圖經本
草云月令王瓜生卽此均房間人呼爲老鴉瓜亦曰菟
瓜按爾雅曰黃蕘瓜郭璞注云似土瓜又曰芴菲亦謂
之土瓜皆別是一物非此土瓜也本草綱目云土瓜其
根作土氣其實似瓜也或云根味如瓜故名瓜似雹子
熟則色赤鴉喜食之故俗名赤雹子老鴉瓜一葉之下
一鬚故俚人呼爲公公鬚王瓜不知何義按兼明書以
枯樓爲王瓜謂其大于土瓜故以王字別之誤也

四月生苗其蔓多鬚嫩時可茹葉圓如馬蹄而有尖面青背淡澀而不光五六月開

小黃花成簇花下結子纍纍如彈丸其殼徑寸長二寸

許上微圓下尖長生青七八月熟赤紅色皮麤澀根如
栝樓根之小者用須深掘二二尺乃得正根江西人栽
以沃土取根作蔬食如山藥南北二種微有不同若療
黃疸破血南者大勝根苦平無毒治天行熱疾酒黃心
胸煩熱消瘀血破癥瘕治面黑面瘡落胎子酸苦平無
毒生用潤心肺治黃病炒用治肺痿吐血腸風瀉血赤
白痢反胃吐食蠱毒

黃環

增本草綱目黃環一名凌泉一名大就一名就葛一名

生芻一名根韭實名狼跋子一名度穀此物葉黃而圓故名黃環亦是

葛類故巴西人謂之就葛跋子乃吳普曰二月生苗正赤
狼足名其莢似之故曰狼跋子

本草綱目 黃環 王瓜 黃環

高二尺葉黃圓端大葉有汁黃白五月實圓三月采根
黃色從理如車輻解根氣味苦平有毒治蠱毒鬼疰鬼
魅邪氣除欬逆寒熱上氣急百邪痰嗽消水腫子氣味
苦寒有小毒治惡瘡蝸疥殺蟲魚塗瘡疥

天門冬

原

天門冬一名藁冬一名滿冬

爾雅云藁藤藁冬注一云門冬一名滿冬

名天棘一名顛棘一名地門冬一名筵門冬一名萬歲

藤抱朴子云在東岳名淫羊藿在西岳名管松在南岳名百部在北岳名無不愈在中岳名天門冬在京陸

山阜名顛勒在越人名浣草名雖異其實一也本草綱目云草之茂者名藁此草茂而功同麥冬故名天門冬

或云天棘爾雅云髦顛棘也因其細葉如髦有細棘也顛天音相近也按救荒本草云俗呼萬歲藤又名婆羅

樹其形與治肺之功頗同百部故亦名百部藁藤乃營實苗而爾雅指爲門冬或古書錯簡也

處處有

之春生藤蔓大如釵股高至丈餘葉如茴香極尖細而
疎滑莖間有逆刺亦有澀而無刺者其葉如絲杉而細
散夏生細白花亦有黃色紫色者秋結黑子在其根枝
旁入伏後無花暗結子其根一科數十枚大如手指圓
實而長黃紫色肉白以大者爲佳中有心如麥冬心而
稍麤性苦平無毒潤燥滋陰清金降火保肺氣通腎氣
養肌膚止消渴治濕疥除身上一切惡氣不潔之疾久
服令人肌體滑澤潔白李時珍云天門冬清金降火益
水之上源故能下通腎氣入滋補方合羣藥用之有效
若脾胃虛寒人單餌既久必病腸滑反成痼疾此物性
寒而潤能利大腸故也服天門冬忌鯉魚誤食中毒者

搗萍汁服之可解

藥考增宋史地理志順慶府貢天門冬 普州貢天門

冬 山海經條谷之山其草多蘘冬 鮮山其草多蘘

冬 列仙傳赤松子服天門冬齒落更生細髮復出

神仙傳甘始者太原人也善行氣不飲食又服天門冬

在世百餘歲入王屋山仙去 抱朴子入山便可以天

門冬蒸煑啖之取足以斷穀若有力可餌之或作散酒

服或搗汁作液膏服至百日丁壯兼倍駛於朮及黃精

也二百日強筋髓駐顏色與煉成松脂同蜜丸服尤善

杜紫微服之御八十妾有子百四十人日行三百里

名山記鬱山出天門冬 建康記建康出天門冬極精

妙 彥周詩話天棘蔓青絲洪覺範硬差天棘作顛柳
高秀實云天棘天門冬也當以秀實之言爲正顛天聲
相近又酷似青絲又江南徐鉉家本云天棘蔓青絲若
蔓生如青絲尤見是天門冬 丹鉛錄山海經小徑之
山有草名蔀赤莖白華如顛冬也顛冬天門冬也

集藻 **啟** **增** 梁簡文帝謝勅賚益州天門冬啟逮自星橋
見珍玉壘本草稱其輕身延壽實爲上藥姬晉之重丹
桂曹丕之愛落英一蒙恩錫竊幸往代

五言絕句 **增** 宋朱子天門冬高蘿引蔓長插榎垂碧絲
西窓夜來雨無人領幽姿

別錄 **原** 種植正二月取苗種肥地中每根相去二尺餘

不得稠不久其根甚茂若取根則留一分小者却栽時
常上糞有草卽耘此物甚難種若都摘了恐不活種子
卽成亦晚 [修治]二三七八月採根雖曝乾猶脂潤難
搗必須去皮心用柳木甑及柳木柴蒸一伏時灑酒令
遍更添火蒸作小架去地二三尺攤於上曝乾用 [服
食]聖化經云以天門冬茯苓等分爲末日服方寸匕則
不畏寒大寒時單衣汗出也 孫真人枕中記云八九
月採天門冬根曝乾爲末每服方寸匕日三服久服補
中益氣治虛勞絕傷年老衰損偏枯不隨風濕不仁冷
痺惡瘡癰疽癩疾鼻柱敗爛者服之皮脫蟲出釀酒服
去癥病積聚風痰顛狂三蟲伏尸除濕痺輕身益氣令

人不饑、百日還童、耐老釀酒、初熟微酸、久停則香美、諸酒不及也。 臞仙神隱云、用乾天門冬十斤、杏仁一斤、搗末蜜漬、每服寸匕、名仙人糧。 一法天門冬二斤、熟地黃一斤、爲末、煉蜜丸、彈子大、每服溫酒化三丸、日三服、居山遠行、辟穀良、服至十日、身輕目明、二十日百病愈、顏色如花、三十日髮白更黑、齒落重生、五十日行及奔馬、百日延年。 又法天門冬搗汁、微火煎、取五斗、入白蜜一斗、胡麻炒末二升、合煎至可丸、卽止、火下大豆黃末和作餅、徑三寸厚半寸、一服一餅、一日三服、百日以上有益。 又法天門冬末一升、松脂末一升、蠟蜜一升、和煎丸如梧子大、每日早午晚各服三十丸。 天門

冬酒補五臟調六腑令人無病天門冬三十斤去心搗碎以水二石煮汁一石糯米一斗細麴十斤如常炊釀酒熟日飲三杯
天門冬膏去積聚風痰補肺療欬嗽失血潤五臟殺三蟲伏尸除瘟疫輕身益氣令人不饑以天門冬流水泡過去皮心搗爛取汁砂鍋文武炭火煮勿令太沸以十斤爲率熬至三斤却入蜜四兩熬至滴水不散瓶盛埋土中一七去火毒每日早晚白湯調服一匙若勤大便以酒服之

百部

原

百部

本草綱目云其根多者百十連屬如部伍故名

一名野天門冬一名婆

婦草山野處處有之春生苗作藤蔓葉大而尖長頗似

竹葉面青而光亦有細葉如荷香者莖青微嫩時亦可
煑食莖多者五六十長尖內虛根數十相連似天門冬
而苦根長者近尺黃白色鮮時亦肥實乾則虛瘦無脂
潤性甘微溫無毒清肺熱潤肺治寒嗽上氣傳尸骨蒸
勞瘵殺虵蟲寸白蠹蟲種法與百合同宜山地

別錄原修治凡採得以竹刀劈去心皮花作數十條懸

簷下風乾却用酒浸一宿漉出焙乾剉用或一窠八十
三條者號曰地仙苗若修治餌之可千歲也 九真一
種最長大懸火上令乾取四五寸切短夜含嚙汁勿令
人知治暴嗽甚良

何首烏

原何首烏一名交藤一名交莖一名夜合一名地精一

名赤葛一名瘡帚一名紅內消一名九真藤一名桃柳

藤一名馬肝石一名陳知白一名野苗圖經本草云此藥本名交藤因

何首烏服而得名也唐元和七年僧文象遇茅山老人

遂傳此事日華本草云其藥本草無名因何首烏見藤

夜交便即採食有功因以採人為名耳李時珍日馬肝

石能治人髮后人隱此名亦日馬肝石赤者能消腫毒

外科呼為瘡帚紅內消斗門方云取根處處有之以西

若獲九數者服之乃仙故名九真藤洛嵩山及栢城縣者為勝有形如鳥獸山川者尤佳春

生苗蔓延竹木墻壁間莖紫色葉葉相對如薯蕷而不

光澤夏秋開黃白花如葛勒花結子有稜似蕎麥而雜

小纔如粟秋冬取根大者如拳連珠有赤白二種赤者

雄苗色黃白白者雌苗色黃赤根遠不過三尺夜則苗

蔓相交或隱化不見性苦澁微溫無毒白者入氣分赤者入血分腎主閉藏肝主疏洩此物氣溫味苦澁苦補腎溫補肝能收斂精氣所以能養血益肝固精益腎健筋骨烏髭鬚治五痔腰膝之病冷氣心痛積年勞瘦痰癖風虛敗劣壯氣駐顏延年益壽功難盡述茯苓爲使忌諸血無鱗魚鐵器犯之令藥無功此藥不寒不燥功在地黃天冬諸藥之上凡服藥用偶日二四六八日服訖以衣覆汗出導引尤良

彙考 **增** 彥州詩話古詩云上山採交藤交藤何首烏也服之令人多欲生子有采采芣苢之意 **原** 李遠附錄

何首烏以出南河縣及嶺南恩州韶州潮州賀州廣州

潘州四會縣者爲上邕州桂州康州春州高州勒州循
州晉興縣出者次之真仙草也五十年者如拳大號山
奴服之一年髮髭青黑一百年者如椀大號山哥服之
一年顏色紅悅一百五十年者如盆大號山伯服之一
年齒落更生二百年者如斗栲栳大號山翁服之一年
顏如童子行及奔馬三百年者如三斗栲栳大號山精
純陽之體久服成地仙本草綱目宋懷州知州李治
與一武臣同官怪其年七十餘而輕健面如渥丹能飲
食叩其術則服何首烏丸也乃傳其方後治得病盛暑
中半體無汗已二年竊自憂之造丸服至年餘汗遂浹
體 此藥流傳雖久服者尙寡嘉靖初邵應節真人以

七寶美髯丹方上進服餌有效連生皇嗣於是何首烏之方天下大行矣

集藻尺牘**增**宋蘇軾與歐陽知晦尺牘聞公服何首烏
是否此藥溫厚無毒李習之傳正爾啖之無炮製今人
用棗或黑豆之類蒸熟皆損其力僕亦服此但採得陰
乾便杵羅爲末棗肉或煉蜜爲丸入木臼中萬杵乃丸
服極有力無毒恐未得此法故以奉白

雜著原唐李翱何首烏錄僧文象好養生術元和七年
三月十八日朝茅山遇老人於華陽洞口告僧曰汝有
仙相吾授汝秘方有何首烏者順州南河縣人祖能嗣
本名田兒天生鬮嗜酒年五十八因醉夜歸臥野中及

醒見田中有藤兩本相遠三尺、苗蔓相交、久乃解、解合三四、心異之、遂掘根持問村野人、無能名、曝而乾之、有鄉人袁良戲而曰、汝闡也、汝老無子、此藤異而後以合其神藥、汝盍餌之、田兒乃篩末酒服、經七宿、忽思人道、累旬、力輕健、慾不制、遂娶寡婦曾氏、田兒因常餌之、七百餘日、舊疾皆愈、反有少容、鄉人異之、十年生數男、俱號爲藥、告田兒曰、此交藤也、服之可壽百六十歲、古方草不載、吾傳於師、亦得之於南河、吾服之、遂有子、吾本好靜、以此藥害於靜、因絕不服、女偶餌之、乃天幸、因爲田兒盡記其功、而改田兒名能嗣焉、嗣年百六十歲、乃卒、男女一十九人、子庭服亦年百六十歲、男女三十人、

子首烏服之年百三十歲，男女二十一人。老人言訖，遂別去。其行如疾風。浙東知院殿中孟侍御識何首烏，嘗餌其藥，言其功如所傳。南人因呼爲何首烏焉。

贊原 無名氏何首烏贊：神効勝道，著在仙書。雌雄相交，夜合晝疏。服之去穀，日居月諸。返老還少，變安病軀。有緣者遇，勗爾自如。

五言古詩 **增** 宋文同寄何首烏丸與友人：此草有奇効，嘗聞於習之。陵陽亦舊產，其地尤所宜。翠蔓走巖壁，芳叢蔚參差。下有根如拳，赤白相雄雌。斷之高秋後，氣味乃不虧。斷以苦竹刀，蒸曝凡九爲。夾羅下香屑，石蜜相和。治入日杵萬過盈盤，走纍纍。日進豈厭屢，初若無所

滋漸久覺膚革鮮潤如凝脂既已鬚髮換白者無一絲
耳目固聰明步履欲走馳十年親友別忽見皆生疑問
胡得爾術容貌曾莫衰爲之講靈苗不爲世俗知蓋以
多見賤蓬藿同一虧君如聽予服此語不敢欺勿信柳
子厚但誇仙靈毗

詩散句 **增** 宋梅堯臣試採上陽何首烏刮切仍致苦竹
刀

別錄原 修治 春夏秋采其根雌雄並用乘濕以布拭去
土曝乾臨時以竹刀切米泔浸經宿曝乾木杵臼搗之
忌鐵器 新採者去皮銅刀切薄片入甑內養鍋蒸之
旋以熱水從上淋下勿令滿溢候無氣息取出曝乾用

近時治法用何首烏赤白各一斤、竹刀刮去麤皮、米泔浸一夜、切片、用黑豆三斗、分九分、每次用一分、以水泡過、砂鍋內鋪豆一層、首烏一層、重重鋪盡、蒸之、豆熟取出去豆、將何首烏曬乾、再以豆蒸、如此九蒸九曬、乃用。

草薺

增本草綱目、草薺一名赤節、一名百枝、一名竹木、一名白菝、萋蘇頌曰、作蔓生、苗葉俱青、葉作三叉、似山薯、又有綠豆葉、花有黃紅白數種、亦有無花、結白子者、根黃白色、多節、三指許大、春秋采根、曝乾、今成德軍所產者、根亦如山薯而體硬、其苗引蔓、葉似蕎麥子、三稜不拘。

時月采根利刀切片曝乾用氣味苦平無毒治腰瘠痛
強骨節風寒濕周痺惡瘡不瘳熱氣癩疾中風補水臟
堅筋骨益精明目

菝葜

增本草綱目菝葜一作菝一名金剛根一名鐵菱角一名

王瓜草菝葜猶矧矧也矧矧短也此草莖蔓強堅短小故名菝葜而江浙人謂之金剛根楚人謂之鐵

菱角皆狀其堅而有尖也鄭樵通志云其葉頗近土瓜故名王瓜草山野中甚多其莖似

蔓而堅強直生有刺其葉團大狀如馬蹄光澤似柿葉

秋開黃花結紅子其根甚硬有硬鬚如刺其葉煎飲酸

澇野人采其根葉入染家用氣味甘酸平無毒治腰背

寒痛風痺益血氣治時疾瘟瘴消渴肝經風虛

集藻 五言古詩 **增** 宋張耒菝葜 江鄉有奇蔬本草寄菝

葜驅風利頑痺解疫補體節春深土膏肥紫筍迸土裂
烹之芼薑橘盡取無可掇應同玉井蓮已過苗頭苗異
時中州去買子攜根撥免令食蔬人區區美薇蕨

土茯苓

增 本草綱目 土茯苓一名土草薺一名刺猪苓一名山

猪糞一名草禹餘糧一名仙遺糧一名冷飯團一名硬

飯一名山地栗 按陶弘景注禹餘糧云南中平澤有一種藤根作塊有節似菝葜而色赤味如

薯蕷亦名禹餘糧即今土茯苓也故今尚有仙遺糧冷飯團之名陳藏器本草草禹餘糧蘇頌圖經刺猪苓皆

此物土茯苓刺猪苓山地栗皆象形也俗又名過岡龍 蔓生如蓴莖有細點其葉

不對狀頗類大竹葉而質厚滑如瑞香葉而長五六寸

廣羣芳譜 藥譜六 菝葜 土茯苓

其根狀如菝葜而圓其大若雞鴨子連綴而生遠者離尺許近或數寸其內軟可生啖有赤白二種入藥用白者良氣味甘淡平無毒食之當穀不饑調中止洩健行不睡健脾胃強筋骨去風濕利關節止泄瀉治拘攣骨痛惡瘡癰腫解汞粉銀朱毒

白歛

增本草綱目白歛一名白草一名白根一名兔核一名

貓兒卵一名崑崙寇宗奭曰歛瘡方多用之故名白歛李時珍曰兔核貓兒卵皆象形也崑

崙言其皮黑也蘇頌曰二月生苗多在林中作蔓赤莖葉如小

桑五月開花七月結實根如雞鴨卵而長三五枚同一窠皮黑肉白一種赤歛花實功用皆同但表裏俱赤氣

味苦平無毒治癰腫疽瘡散結氣止痛除熱目中赤小兒驚癇溫瘧殺火毒刀箭瘡撲損解狼毒毒

女萎

增唐本草女萎葉似白斂蔓生花白子細亦名蔓楚氣味辛溫無毒治風寒霍亂洩痢腸鳴遊氣上下無常驚癇寒熱百病出汗

赭魁

增本草綱目赭魁其根如魁有汁如赭故名魁乃酒器名韓保昇曰苗蔓

延生葉似蘿摩根若菝葜皮紫黑肉黃赤大者輪如升小者如拳李時珍曰汝沈括筆談云今南中極多膚黑肌赤似何首烏切破中有赤理如檳榔有汁赤如赭彼

人以染皮製靴閩人謂之餘糧氣味甘平無毒治心腹積聚除三蟲

鵝抱

增圖經本草鵝抱生宜州山林下附石而生作蔓似大豆其根形似萊菔大者如三升器小者如拳氣味苦寒無毒治風熱上壅咽喉腫痛及解蠶箭藥毒亦消風熱結毒

伏雞子

增本草拾遺伏雞子根一名承露仙蔓延生葉圓薄似錢根似鳥形者良氣味苦寒無毒解百藥毒治諸熱煩悶急黃天行黃疸瘡瘡中惡寒熱頭痛疽瘡馬黃牛瘡

亦傳癰腫

附錄 仰盆

增本草拾遺 仰盆苗似承露仙根圓如仰盆狀大如雞卵味辛溫有小毒治蠱毒飛尸喉痺磨傅皮膚惡腫

附錄 人肝藤

增本草拾遺 人肝藤引蔓而生葉有三樞花紫色與伏雞子同名承露仙而伏雞子葉圓解諸藥毒遊風手脚軟痺

九仙子

增本草綱目 九仙子一名仙女嬌一根連綴九枚大者如雞子小者如半夏白色二月生苗蔓高六七尺莖細

原书缺页

蜘蛛傷

黃藥子

增本草綱目黃藥子一名木藥子一名大苦一名赤藥

一名紅藥子按沈括筆談云本草注引郭璞注爾雅云

色青黃莖赤有節節有枝相當此乃黃藥也其味極苦故曰大苦非甘草也今處處人栽之

其莖高二三尺柔而有節似藤葉大如拳長三寸許其

根長者尺許大者圍二三寸外褐內黃亦有黃赤色者

肉色頗似羊蹄根冬枯春生開碎花無實氣味苦平無

毒治諸惡腫瘡癩喉痺蛇犬咬毒涼血降火消癭解毒

解毒子

增圖經本草解毒子一名地不容出戎州蔓生葉青如

黃藥子普藥譜六解毒子卷尊

杏葉而大厚硬凌冬不凋無花實根黃白色外皮微麤
褐纍纍相連如藥實而圓大采無時又開州興元府出
苦藥子大抵與黃藥相類春采根暴乾亦入馬藥用氣
味苦大寒無毒解蠱毒止煩熱辟瘴癘利喉閉及痰毒
治五臟邪氣清肺壓熱消痰降火利咽喉退目赤

附錄奴會子

增海藥本草奴會子生西國諸戎大小如苦藥子味辛
平無毒主小兒冷疝虛渴脫肛骨立瘦損

附錄海藥實

增本草綱目海藥實一名連木蘇恭曰蕃名那疏樹生
葉似杏花紅白色子肉味酸李時珍曰此藥子似黃藥

苦藥子而稍有不同二藥子不結子此則樹之子也去皮取中仁用味辛溫無毒治邪氣諸痺疼酸續純傷補骨髓破血止痢消腫除蠱注蛇毒

白藥子

增本草綱目蘇恭曰白藥子三月生苗葉似苦苣四月抽赤莖長似壺盧蔓六月開白花八月結子亦名瓜蔓九月葉落枝折根皮黃色氣味辛溫無毒治金瘡生肌消腫毒喉痺消痰止嗽治渴并吐血喉痺咽痛解野葛生金巴豆藥毒傅刀斧折傷能止血痛散血降火消痰解毒

附錄 陳家白藥

增嶺表錄陳家白藥善解毒封州康州有種之者廣府
每歲克土貢 本草綱目陳家白藥出蒼梧陳家蔓及
根並似土瓜葉如錢根似防已緊小者良味苦寒無毒
主解諸藥毒亦去心胸煩熱天行瘟瘴

附錄甘家白藥

增本草拾遺甘家白藥出龔州以南生陰處葉似車前
根如半夏其汁飲之如蜜味苦大寒有小毒解諸藥毒
與陳家白藥功相似

附錄會州白藥

增本草拾遺會州白藥葉如白斂傅金瘡生膚止血

附錄衝洞根

增海藥本草衝洞根苗蔓如土瓜根亦相似 本草拾

遺衝洞根味苦平無毒主熱毒蛇犬蟲癰瘡等毒

附 突厥白 錄

增開寶本草突厥白根黃白色狀似茯苓而虛軟苗高

三四尺春夏葉如薄荷花似牽牛而紫上有白凌二八

月采根味苦治金瘡生血止血補腰續筋

威靈仙

增本草綱目威靈仙 威言其性猛也靈蘇頌曰陝西及

河東河北汴東江湖州郡皆有之初生作蔓莖如釵股

七月內生花六出淺紫或碧白色作穗似莆藎子亦有

似菊花頭者實青色根稠密多鬚似穀李時珍曰其根

履齋考證 藥譜一
每年旁引年深轉茂一根叢鬚數百條長者二尺許初時黃黑色乾則深黑俗稱鐵脚威靈仙別有數種根鬚皆一樣色或黃或白皆不可用氣味苦溫無毒治諸風宣通五臟去腹內冷滯心膈痰水久積痕癥疔癰氣塊腰膝疼療折傷散風邪久服無有溫瘧疾

彙考 **增** **圖經本草**唐貞元中周君巢作威靈仙傳云商州有人病手足不遂不履地者數十年良醫殫技莫能療所親置之道旁以求救者遇一新羅僧見之告曰此疾一藥可活但不知此土有否因爲之入山求索果得乃威靈也使服之數日能步履山人鄧思齊知之遂傳其事

別錄增志林服威靈仙有二法其一淨洗陰乾搗羅爲

末酒浸牛膝末或蜜丸或爲散酒調牛膝之多少視臟腑之虛實而增減之此脣山一親知患脚氣至重依此服半年遂永除其一法取此藥麤細得中者寸截之七寸作一貼每歲作三百六十貼置牀頭五更初面東細嚼一貼候津液滿口嚙下此牢山一僧年百餘歲上下山如飛云得此藥方二法皆以得真爲要真者有五驗一味極苦二色深翠三折之脆而不勒四折之有微塵如胡黃連狀五斷處有白暈謂之鳩鴉眼無此五驗則藁本根之細者耳又須忌茶以槐角皂角牙之嫩者依造草茶法作或只取外臺秘要代茶飲子方常合服

乃可

翦草

增本草綱目陳藏器曰翦草生山澤間葉如茗而細李時珍曰狀如茜草又如細辛氣味苦涼無毒治諸惡瘡疥癬風瘙癢蝕有蟲一切失血

防已

增本草綱目防已一名解離一名石解李杲云防已如險健之人幸災

樂禍能首為亂階若善用之亦可禦宗蘇頌曰漢中出者

敵其名或取此義解離因其紋解也破之文作車輻解黃實而香莖梗甚嫩苗葉小類牽牛

折其莖一頭吹之氣從中貫如木通然他處者青白虛

軟又有腥氣皮皺上有丁足子名木防已氣味辛平無

毒治風寒溫瘧熱氣諸癰除邪療水腫風腫去膀胱熱
傷寒熱邪氣中風手脚攣急通腠理利九竅止洩散癰
腫惡結諸痼疥癬蟲瘡散留痰肺氣喘嗽木防已治男
子肢節中風毒風不語散結氣擁腫溫瘧風水腫去膀
胱熱

木通

增本草綱目通草一名木通其莖中通故名通草即今所謂木通今之通草乃通

脫木也一名附支一名丁翁一名萬年藤子名燕覆蘇恭曰南

人謂爲燕覆子或名烏覆子陳藏器云江東人呼爲畜蒿子江西人呼爲拏子陶弘景曰遶樹

藤生汁白莖有細孔兩頭皆通合一頭吹之則氣出彼

頭者良蘇頌曰蔓大如指其莖榦大者徑三寸一枝五

葉頗類石韋又似芍藥二葉相對夏秋開紫花亦有白花者結實如小木瓜食之甘美卽陳士良本草所謂桴棧子也李時珍曰有紫白二色紫者皮厚味辛白者皮薄味淡治除脾胃寒熱通利九竅血脉關節令人不忘去惡蟲療脾疸噦噫散癰腫諸結不消及金瘡惡瘡鼠瘻踈折斃鼻息肉利諸經脉寒熱不通之氣理風熱安心除煩止渴退熱明目眩羸劣乳結喉痺咽痛導小腸治天行時疾頭痛目眩羸劣乳結喉痺咽痛導小腸火

通脫木

增爾雅離南活蒼注草生江南高丈許大葉莖中有瓢

正白零陵人植日灌之爲樹 本草綱目通脫木一名

通草

蘇頌曰爾雅活菀即通脫也山海經名寇脫又名倚商李杲曰能通竅利水固有通草之名與木通

同功陳嘉謨曰白瓢中藏脫木得之故名通脫陳藏器曰生山側葉似蓖麻其

莖空心中有白瓢輕白可愛女人取以飾物俗名通草

蘇頌曰今園圃有種蒔者或作蜜煎克果食之甘美氣

味甘淡寒無毒利陰竅治五淋除水腫癰閉瀉肺解諸

毒蟲痛明目退熱下乳催生花上粉治諸蟲癩惡瘡痔

疾癰癧及胸中伏氣攻胃咽

考增

山海經升山其草多寇脫注寇脫草生南方高

丈許似荷葉而莖中有瓢正白零桂人植而日灌之以

為樹也 熊山下其草多寇脫

附天壽根錄

增圖經本草天壽根出台州每歲土貢其性涼治胸膈煩熱

金銀藤

原金銀藤一名忍冬一名通靈草一名鴛鴦藤一名左

纏藤一名蜜桶藤一名鷺鷥藤一名老翁鬚一名金釵

股本草注云凌冬不凋故名忍冬綱目云其花長瓣垂鬚黃白相間而藤左纏故有金銀諸名金釵股貴其

功也土宿真君云蜜桶藤取汁能伏硫制汞故有通靈之稱處處有之附樹延蔓莖

微紫色有薄皮膜之其嫩莖色青有毛對節生葉葉如

薜荔而青有濇毛三四月後開花不絕花長寸許一帶

兩花二瓣一大一小長蕊初開者蕊瓣俱白經三二日

則變黃新舊相參黃白相映故呼金銀花氣甚清芬四

月采花藤葉不拘時采俱陰乾氣味甘寒無毒功用皆同治風除脹解痢逐尸消腫散毒療癰疽疥癬發背楊梅諸惡瘡皆爲要藥

集藻

五言古詩

增

金段克己同封仲堅采鷺鷥藤因而

成詠寄家弟誠之有藤名鷺鷥天生匪人育金花間銀蕊翠蔓自成簇褰裳涉春溪采之漸盈掬藥物時所需非爲事口腹牛溲與馬渤良醫猶並蓄况此香色奇兩通鼻與目尤喜療瘡瘍先賢講之熟世俗不知愛棄置在空谷作詩與題評使異凡草木
段成己和鷺鷥藤詩并序吾兄同仲堅采鷺鷥藤於午芹之東溪因詠詩見示前代詩人未嘗聞賦此者此花長於田野籬落間

人視之與草芥無異是詩一出好事者將知所貴矣感
歎之餘敬次其韻有與我同志繼而述之不亦懿乎微
雨灑郊垆百卉欣並育幽花發溪側間錯金珠簇徐看
是鷲藤香味濃可掬忍饑出新句大笑負此腹遺落榛
莽間采擷誰見蓄情知無俗姿安能悅衆目先生日來
往東溪路應熟一經品題餘名字耀巖谷遇合良有時
不才異山木

鈎藤

增本草綱目鈎藤

陶弘景日出建平亦作平藤李時珍曰其刺曲如鈎故名人呼爲鈎

藤

寇宗奭曰藤長八九尺或一二丈大如莓指其中空

李時珍曰狀如葡萄藤而有鈎紫色古方多用皮後世

多用鈎氣味甘微寒無毒治小兒寒熱十二驚癇小兒驚啼癩癧熱擁客忤胎風大人頭旋目眩平肝風除心熱小兒內釣腹痛發斑疹

附錄 倒掛藤

增 本草拾遺倒掛藤生深山有逆刺如懸鈎倒掛於樹葉尖而長味苦無毒主一切老血及產後諸疾結痛血上欲死煮汁服之

白兔藿

增 本草綱目白兔藿蘇恭曰山南人謂之白葛苗似蘿摩圓厚莖有白毛與衆草異韓保昇曰蔓生葉圓似蓴五月六月采苗氣味苦平無毒治蛇虺蜂蠆狗菜肉

蠱毒鬼疰風疰諸大毒

白英

增本草綱目白英一名穀菜一名白幕一名排風子名

鬼目

白英謂其花色穀菜象其葉文排風言其功用鬼目象其子形

蘇恭曰蔓生葉似

王瓜小長而五椹實圓似龍葵子生青熟紫黑東人謂

之白草李時珍曰正月生苗白色可食秋開小白花根

苗氣味甘寒無毒治寒熱入疸消渴補中益氣久服輕

身延年葉作羹飲甚療勞煩熱風癰丹毒瘡瘧寒熱小

兒結熱子酸平無毒主明目

茺蘭

增

爾雅藿茺蘭注藿茺蔓生斷之有白汁可啖

陸璣

詩疏芄蘭一名蘿摩幽州人謂之雀瓢 本草綱目蘿

摩一名白環藤實名雀瓢一名斫合子一名羊婆奶一

名婆婆鍼線包

陳藏器曰漢高帝用子博軍士金瘡故名斫合子李時珍曰白環即芄字之訛

其實嫩時有漿裂時如瓢故右雀瓢羊婆奶之稱其中一子有一條白絨長二寸許故俗呼婆婆鍼線包又名

婆婆鍼袋兒也陶弘景曰蘿摩作藤生摘之有白乳汁人家多

種之葉厚而大可生啖亦蒸煑食之李時珍曰三月生

苗蔓延籬垣極易繁衍其根白軟其葉長而後大前尖

根與莖葉斷之皆有白乳如構汁六七月開小長花如

鈴狀紫白色結實長二三寸大如馬兜鈴一頭尖其殼

青軟中有白絨及漿霜後枯裂則子飛其子輕薄亦如

兜鈴子氣味甘辛溫無毒治虛勞補益精氣強陰葉煑

食功同子搗子傅金瘡生膚止血搗葉傅腫毒取汁傅丹毒赤腫及蛇蟲毒

彙考 **增** 詩衛風芄蘭之支

赤地利

增 本草綱目赤地利一名赤薜荔一名五毒草一名五藪一名蛇苒一名山蕎麥蘇頌曰春夏生苗作蔓繞草木上莖赤葉青似蕎麥葉七月開白花亦如蕎麥結子青色根若菝葜皮紫赤肉黃赤八月采根曬乾收氣味苦平無毒治赤白冷熱諸痢斷血破血生肌肉主癰疽惡瘡毒腫赤白遊癩醋磨傅蟲蠶蛇犬咬亦搗莖葉傅之恐毒入腹煮汁飲

紫葛

增唐本草紫葛生山谷中苗似葡萄長丈許根紫色大者徑二三寸氣味甘苦寒無毒主傳癰腫惡瘡

烏蘇莓

增爾雅拔龍葛注似葛蔓生有節江東呼為龍尾亦謂之虎葛細葉赤莖本草綱目烏蘇莓一名五葉莓一

名龍草一名赤葛一名五爪龍一名赤潑藤即爾雅拔

葉如白蘇故曰烏蘇俗名五爪龍曰龍尾曰蘇恭曰蔓虎葛並取蔓形赤潑與赤葛及拔音相近

生平澤葉似白蘇韓保昇曰莖端五葉開花青白色李時珍曰其藤柔而有稜一枝一鬚凡五葉葉長而光有

疎齒面青背淡七八月結苞成簇青白色花大如粟黃

色四出結實大如龍葵子生青熟紫內有細子其根白色大者如指長一二尺擣之多涎滑氣味酸苦寒無毒傳癰癧瘡腫蟲咬風毒熱腫遊丹涼血解毒利小便消癰腫

葎草

增本草綱目葎草一名勒草一名葛勒蔓一名來苒草

此草莖有細刺善勒人膚故名勒草
訛爲葎草又訛爲來苒皆方音也 二月生苗莖有細

刺葉對節生一葉五尖微似蓖麻而有細齒八九月開細紫花成簇結子狀如黃麻子氣味甘苦寒無毒治瘀血止精益盛氣療五淋利小便止水痢除瘧虛熱渴治傷寒汗後虛熱疥癩潤三焦消五穀益五臟除九蟲辟

溫疫傳蛇蠍傷

澤瀉

增爾雅滄蔦注今澤蔦疏卽藥草澤瀉也本草一名水

瀉一名及瀉一名芒芋一名鵠瀉本草綱目澤瀉一

名禹孫去水曰瀉如澤水之瀉也禹能治水故名禹孫蘇頌曰山東河陝江淮

皆有之漢中者爲佳春生苗多在淺水中葉似牛舌獨

莖而長秋時開白花作叢似穀精草秋末采根曝乾氣

味甘寒無毒治風寒濕痺乳難養五臟益氣力肥健消

水治痞滿五淋消腫脹滲洩止渴滲濕熱行痰飯止嘔

吐瀉痢

羊蹄

續本草方音 羊蹄

增陸璣詩疏遂牛薺揚州謂之羊蹄似蘆菔而莖赤可

淪為茹滑而美也多啖令人下氣幽州人謂之遂 **本**

草綱目羊蹄一名蓄一名秃菜一名敗毒菜一名牛舌

菜一名羊蹄大黃一名鬼目一名東方宿一名連蟲陸

一名水黃芹子名金蕎麥 陶弘景曰今人呼為秃菜即蓄字音訛也李時珍曰羊蹄

以根名牛舌以葉形名秃菜以治秃瘡名也金蕎麥以相似名也 近水及濕地極多葉

長尺餘似牛舌之形不似波稜入夏起臺開花結子花

葉一色夏至即枯秋深即生凌冬不死根長近尺赤黃

色如大黃胡蘿蔔形氣味苦寒無毒治頭秃疥癩浸淫

疽痔腫毒殺蟲療蠱毒治癬殺一切蟲治產後風祕葉

甘滑寒無毒治小兒疳蟲腸痔瀉血殺河豚魚毒作菜

多食滑大腑

酸模

增爾雅須薺蕪注薺蕪似羊蹄葉細酢可食 本草綱

目酸模一名山羊蹄一名山大黃一名酸母一名蓀一

名當藥即爾雅薺蕪也薺蕪乃酸模之音轉酸模又酸母之轉皆以味而名與三葉酸母草同名掌禹

錫以薺蕪為蔓菁菜誤矣 大明曰狀似羊蹄葉而小黃莖葉俱細節

間生子若菟蔚李時珍曰根葉花形並同羊蹄但葉小

味酸為異其根赤黃色連根葉取汁煉霜可制雄汞氣

味酸寒無毒治暴熱腹脹殺皮膚小蟲治疥療痢去汗

斑

龍舌草

增本草綱目龍舌葉如大葉菘菜及芣苢狀根生水底抽莖出水開白花根似胡蘿蔔根而香杵汁能軟鵝鴨卵方家用煮丹砂煨白礬制三黃氣味甘鹹寒無毒搗塗癰疽湯火灼傷

麩舌

增名醫別錄麩舌生小水中五月五日采乾以治霍亂甚良味辛微溫無毒主腹痛吐逆心煩又有牛舌實一名豕首生水中澤旁大葉長尺五月采實今東土人呼水中大葉如牛耳者為牛耳菜味鹹溫無毒主輕身益氣

石斛

增本草綱目石斛一名石薺一名金釵一名禁生一名

林蘭一名杜蘭

石斛石薺未詳其莖狀如金釵之股故古有金釵石斛之稱今蜀人栽之呼爲

金釵花林蘭杜蘭與木部木蘭同名恐誤

蘇恭曰有二種一種似大麥累累

相連頭生一葉而性冷名麥斛一種莖大如雀髀葉在

莖頭名雀髀斛其他斛如竹而節間生葉也蘇頌曰多

在山谷中五月生苗莖似小竹節節間出碎葉七月開

花十月結實其根細長黃色惟生石上者爲勝李時珍

曰石斛叢生石上其根糾結甚繁乾則白軟其莖葉生

皆青色乾則黃色開紅花節上自生根鬚人亦折下以

砂石栽之或以物盛挂屋下頻澆以水經年不死俗稱

爲千年潤石斛短而中實木斛長而中虛處處有之以

蜀中者為勝氣味甘平無毒治傷中除痺下氣補五臟
虛勞羸瘦久服厚腸胃補內絕不足平胃氣長肌肉逐
皮膚邪熱痹氣脚膝疼冷痺弱定志除驚輕身延年益
智清氣

骨碎補

增本草綱目骨碎補一名猴薑一名胡猴薑一名石毛

薑一名石菴藟

陳藏器曰骨碎補本名猴薑開元皇帝

碎布訛矣江西人呼為胡猴薑象形也李時珍曰菴藟上折傷破血此物功同故有菴藟之名蘇頌曰

淮浙陝西夔路州郡皆有之生木或石上多在背陰處

引根成條上有黃赤毛及短葉附之抽大葉成枝葉面

青綠有青黃點背青白色有赤紫點春生葉至冬乾黃

無花實采根入藥李時珍曰其根扁長畧似薑形其葉有極缺頗似貫衆葉氣味苦溫無毒破血止血補傷折骨中毒氣風血疼痛五勞惡疾蝕爛肉殺蟲

石韋

增本草綱目石韋一名石韠一名石皮一名石蘭

陶弘景曰

蔓延石上生葉如皮故名石韋李時珍曰柔皮曰韋韠亦皮也蘇恭曰此物叢生石旁

陰處其生古瓦屋上者名瓦韋蘇頌曰今晉絳淦海福州江寧皆有之叢生石上葉如柳背有毛而斑點如皮福州別有一種石皮三尺有毛采作浴湯治風李時珍曰多生陰崖險罅處其葉長者近尺濶寸餘柔韌如皮背有黃毛凌冬不凋又一種如杏葉者亦生石上其性

相同氣味辛平無毒治勞熱邪氣五癢閉不通利小便水道止煩下氣通膀胱滿補五勞安五臟去惡風益精氣治淋瀝發背主崩漏金瘡清肺氣

石莧

增圖經本草石莧生筠州多附河岸沙石上春生苗莖青高一尺以來葉如水柳而短八九月土人采之氣味辛苦有小毒同甘草煎服主齁齕又吐風涎

附石垂

增圖經本草石垂生福州山中三月花四月采子生擣為末丸服治蠱毒

景天

原 一名慎火

本草注云栽之可救火故曰慎火

一名戒火 一名護火 一

名辟火 一名救火 一名火母 人多種於石山上 二月生苗 脆莖微帶赤黃色 高一二尺 折之有汁 葉淡綠色 光澤柔厚 狀似長匙頭 及胡豆葉 而不尖 夏開小白花 結實如連翹 而小 中有黑子 如粟粒 其葉味苦平 無毒 治大熱火瘡 諸蠱寒熱 療金瘡 止血 除熱 狂赤眼 頭痛 寒熱 游風 可煨硃砂 苗葉花並可用 葉煮熟水 淘可食 南北皆有人家 多種於中庭 或盆栽 置屋上 以防火 極易生 折枝置土中 澆灌 旬日便活

彙考

增 南越志

廣州有樹 可以禦火山 北謂之慎火 或

謂之戒火 多種屋上 以防火也 南中無霜雪 故成樹

倦遊錄 慎火卽龍骨樹也

集藻 五言古詩 **增** 梁范筠詠慎火草 茲卉信叢叢微榮

未足奇何期糝香草遂得遶花池忘憂雖無用止談或有施早得建章立幸蕪栢梁垂

五言絕句 **增** 宋王十朋慎火草 禁殿安蚩尾騷人逐畢方何如栽此草有火自能妨

石胡荽

增 本草綱目 石胡荽一名天胡荽一名野園荽一名鵝不食草一名雞腸草生石縫及陰濕處小草也高二三寸冬月生苗細莖小葉形狀宛如嫩胡荽其氣辛薰不堪食鵝亦不食之夏開細花黃色結細子極易繁衍僻

地則鋪滿也氣味辛寒無毒通鼻氣利九竅吐風痰去目醫療痔病解毒明目治耳聾頭痛腦酸痰瘧齟齬鼻窒不通散瘡腫

螺曆草

增本草拾遺螺曆草一名鏡面草蔓生石上葉狀似螺曆微帶赤色而光如鏡背有少毛小草也味辛治癰腫風疹脚氣腫

酢漿草

增本草綱目酢漿草一名酸漿一名三葉酸一名三角酸一名酸母一名醋母一名酸箕一名鳩酸一名雀兒酸一名雀林草一名小酸茅一名赤孫施

此小草三葉酸也其味如

醋與燈籠草之酸漿各同物異
鄭樵通志言福人謂之孫施

李時珍曰苗高一二寸

叢生布地極易繁衍一校三葉一葉兩片至晚自合帖
整整如一四月開小黃花結小角長一二分內有細子
冬亦不凋方士采制砂汞礪礬砒石氣味酸寒無毒殺
諸小蟲治惡瘡癩癭諸淋赤白帶塗湯火蛇蝎傷

附錄酸草

增名醫別錄酸草生名山醴泉上陰厓莖有五葉青澤
根赤黃可以消玉一名醜草主輕身延年

附錄三葉

增名醫別錄三葉生田中莖小黑白高三尺根黑三月
采陰乾一名三石一名當用一名赴魚味辛治寒熱蛇

蜂螫人

地錦

增本草綱目地錦一名地朕一名地噤一名夜光一名

承夜一名草血竭一名血見愁一名血風草一名馬螳

草一名雀兒臥單一名醬瓣草一名猢猻頭草赤莖布地故曰

地錦專治血病故俗稱為血竭血見愁馬螳雀兒喜聚之故有馬螳雀兒單之名醬瓣猢猻頭象花葉形也掌

禹錫曰莖葉細弱蔓延於地莖赤葉青紫色夏中茂盛

六月開紅花結細實取苗子用之李時珍曰田野寺院

及階砌間皆有之就地而生赤莖黃花黑實狀如蒺藜

之朶斷莖有汁方士秋月采煮雌雄丹砂硫黃氣味辛

平無毒通流血脈治癰腫惡瘡金刃撲損出血血痢下

地錦金匱本草

血崩中能散血止血

附錄金瘡小草

增本草拾遺金瘡小草生江南村落田野間下濕地高一二寸許如薺而葉短春夏間有淺紫花長一粳米許味甘平無毒主金瘡止血長肌斷鼻中衄血血瘀及卒下血

崖櫻

增圖經本草崖櫻生施州石崖上苗高一尺以來其狀如櫻四季有葉無花土人采根去麤皮入藥氣味甘辛溫無毒治婦人血氣並五勞七傷同雞翁藤半天回野蘭根洗焙爲末溫酒服

附錄 雞翁藤

增圖經本草雞翁藤生施州蔓延大木上有葉無花味辛性溫無毒采無時

附錄 半天回

增圖經本草半天回生施州春生苗高二尺以來赤斑色至冬苗枯土人夏月采根味苦澹性溫無毒

附錄 野蘭根

增圖經本草野蘭根生施州叢生高二尺以來四時有葉無花其根味微苦性溫無毒采無時

紫背金盤

增本草綱目蘇頌曰紫背金盤生施州苗高一尺以來

本草綱目蘇頌曰紫背金盤生施州苗高一尺以來

葉背紫無花土人采根用李時珍曰湖湘水石處皆有
之名金盤藤似醋筒草而葉小背微紫軟莖引蔓似黃
絲槎之卽斷無汁可見方士用以制汞他處少有氣味
辛瀉熱無毒治婦人血氣痛孕婦勿服能消胎氣

附錄
醋筒草

增本草綱目醋筒草葉似木芙蓉而偏莖空而脆味酸
開白花廣人以鹽醋淹食之

白龍鬚

增本草綱目白龍鬚生近水旁有石處寄生搜風樹節
乃樹之餘精也細如櫻絲直起無枝葉最難得真者一
種萬纏草生於白線樹根細絲相類但有枝莖稍麤爲

異氣味平無毒治男子婦人風濕腰腿疼左癱右瘓
口目喎斜及產後氣血流散惟虛勞癱痿不可服

馬勃

增本草綱目馬勃一名馬疔一名馬竄一名灰菰一名
牛屎菰陶弘景曰紫色虛軟狀如狗肝彈之粉出寇宗
奭曰生濕地及腐木上夏秋采之有大如斗者小亦如
升杓氣味辛平無毒治惡瘡馬疥傳諸瘡治喉痺咽疼
清肺散血熱解毒

佩文齋廣羣芳譜卷第九十八